

Uvodnik

U ovom posljednjem broju Novog Muallima u 2017. godini, u rubrici Putokazi objavljujemo tekst *Od cilja odgoja i obrazovanja do ishoda procesnog mišljenja*, prof. dr. Muje Slatine. Razmatrajući pitanje procesa konkretizacije cilja odgoja i obrazovanja u nastavnoj praksi, autor nastoji ukazati na cjelinu jednog putokaza u tom procesu, koji polazi od antropološke osnove cjelovito razvijene ličnosti kao cilja odgoja i obrazovanja, preko ljudskih potreba, učenja uopće, taksonomije obrazovnih ciljeva pa sve do ishoda učenja. U radu se, između ostalog, zaključuje kako cjelovito razvijena ličnost kao cilj odgoja i obrazovanja ne dopušta da se škole svedu na institucije koje nude samo radnu snagu, da budu samo u funkciji društvene i kulturne reprodukcije jer ovaj cilj traži odgoj i obrazovanje radi samog čovjeka.

Za rubriku Sagledavanja odabrali smo tekst Emine Čeman-Kiremitci koji nudi jedan pogled na feminističku misao Fatime Mernissi, jedne od najpoznatijih feministkinja u muslimanskom svijetu, u svjetlu njene obrade uloge Aiše, r.a., u medinskoj zajednici, koju Mernissi, stavlja u fokus svojih autorskih studija. U istoj je rubrici i rad Sumeje Ljevaković-Subašić o fenomenu ženskih džamija u svijetu, ali i kod nas. Šta su razlozi koji su doveli do toga da se u Evropi i Americi otvaraju džamije samo za žene? Kakva je situacija u Bosni i Hercegovini u kontekstu ovog fenomena? U ovom radu prikazana je kratka analiza mjesta i uloge žena u džamijama u vrijeme Vjerovjesnika, s.a.v.s., kao i njihovo mjesto i uloga u džamijama danas. Rad donosi i određene uvide u neka tumačenja islama o rodnim odnosima, posebno tumačenja o statusu žena u džematu / zajednici, te uvide u politike muslimanskih zajednica nadahnutih takvim tumačenjima, koje su nerijetko rezultirale reduciranim uključivanjem ili potpunim isključivanjem žena iz prostora džamije, a tako i iz rada muslimanskih zajednica. U radu se, u kontekstu otvaranja ženskih džamija na Zapadu, osvjetljavaju i okolnosti nastanka i uspostave ženskih džamija u Bosni i Hercegovini, te nudi i analiza sličnosti i razlika u nazivima ženskih džamija u svijetu i Bosni i Hercegovini, kao i analiza aktivnosti, načina rada i vjerskih obreda koji se provode u ovim džamijama.

Oba rada iz rubrike Sagledavanja značajni su uvidi u fenomen onoga što bi se moglo nazvati, uslovno kazano, direktnom posljedicom tumačenja islama prema kojima se ljudima dodjeljuju "mjesta" i "uloge" na osnovu spola i odmaka od poruke islama u kojoj su i muškarci i žene adresanti Božije poruke. Stoga smo, u ovom broju, u rubrici Intervju, o tim pitanjima razgovarali sa prof. Shuruq Naguib, čije istraživanje obuhvata dvije ključne oblasti: klasičnu i predmodernu intelektualnu i tekstualnu tradiciju, posebno hermeneutiku Kur'ana i obredoslovlje, i muslimanske odgovore na modernost.

Vašoj čitalačkoj pažnji preporučujemo i tekstove iz ostalih rubrika, nadajući se da će izbor tekstova za ovaj broj biti podsticajan za daljnja istraživanja iz ovih oblasti.

Na kraju, s obzirom na to da je ovo posljednji broj koji uređujem kao glavna urednica Novog Muallima, zahvaljujem se svim vjernim čitaocima zbog kojih je Muallim, u vremenu svekolikih devalvacija istraživanja i obrazovanja uopće, ipak uspijevao aktivno živjeti i zbog kojih će se, ako Bog da, nastaviti razvijati. Zahvaljujem se i Glavnom odboru Udruženja ilmije Islamske zajednice u Bosni i Hercegovini koje već osamnaest godina prepoznaje važnost postojanja ovakvog časopisa. Također, zahvaljujem se i Mensur ef. Pašaliću, predsjedniku Glavnog odbora Udruženja ilmije IZ u BiH, za podršku u radu i nesebično zalaganje da izazove s kojima se inače suočavaju izdavači stručnih i naučnih časopisa pretoči u prednosti.

Posebno se zahvaljujem na izvanrednoj saradnji svim članovima redakcije, savjetu, autorima i saradnicima časopisa, s kojima je bila i čast i zadovoljstvo voditi ovakav projekt.

Senada Tahirović